

四庫全書

集部

欽定四庫全書

集部

唐詩鏡卷十四至
七

詳校官庶吉士臣范逢恩

主事銜

臣徐以坤覆勘

總校官編修臣王燕緒

校對官中書臣章煦

謄錄監生臣侯錫樂

欽定四庫全書

唐詩鏡卷十四

明 陸時雍 編

盛唐第六

崔顥

汴州人開元十一年進士有俊才無士行好蒲博飲酒及遊京師娶妻擇有貌者稍不愜意即去之

前後數四累官司勳員外郎天寶中卒

七言古詩

七夕

長安城中月如練家家此夜持針線
仙裙玉珮空自知
天上人間不相見
長信深陰夜轉幽
瑤階金閣數螢流
班姬此夕愁無限
河漢三更看斗牛

五言律詩

題沈隱侯八詠樓

梁日東陽守為樓望越中
綠牕明月在青史
古人空江靜聞山
狔川長數塞鴻登臨
白雲晚流恨此遺風

語氣朗然
數字不穩

附晚入汴水 昨晚南行楚今朝北汴河客愁能幾
日鄉路漸無多 晴景搖津樹春風起棹歌長淮亦已
盡寧復畏潮波
三四語意最傷

七言律詩

黃鶴樓

昔人已乘白雲去此地空餘黃鶴樓黃鶴一去不復返

白雲千載空悠悠晴川歷歷漢陽樹芳草萋萋鸚鵡洲

日暮鄉關何處是煙波江上使人愁

李太白登黃鶴樓
有眼前有景道不

得崔顥題詩在上頭之句至
金陵乃作鳳凰臺詩以擬之

此詩氣格高迥渾若天成第律家正體當不如是以古體行律在五言不可何況七言後人因太白

所推莫敢
齟齬耳

附行經華陰 峒峩太華俯咸京天外三峯削不成
武帝祠前雲欲散仙人掌上雨初晴河山北枕秦關
險驛樹西連漢時平借問路傍名利客無如此處學長生
語無留蘊

五言排律

奉和許給事夜直簡諸公

西掖黃樞近東曹紫禁連地因才子拜人用省郎遷夜
直千門靜河明萬象縣建章宵漏急閭闔曉鐘傳寵列

貂蟬位恩深侍從年九重初起草五夜即成篇顧已無
官次循涯但自憐遠陪蘭署作空此仰神僊

三四
清切

五言絕句

長干曲

君家何處住妾住在橫塘停船暫借問或恐是同鄉
家臨九江水來去九江側同是長干人生小不相識

宛是
情語

常建

開元十五年進士
大厯中為盱眙尉

常建好作清異
然得意未深

五言古詩

宿王昌齡隱居

清谿深不測
隱處惟孤雲
松際露微月
清光猶為君
茅亭宿花影
藥院滋苔紋
余亦謝時去
西山鸞鶴羣

三四意
趣佳

西山

一身為輕舟落日西山際常隨去帆影遠接長天勢物
象歸餘清林巒分夕麗亭亭碧流暗日入孤霞繼渚日
遠陰映湖雲尚明霽林昏楚色來岸遠荆門閉至夜轉
清迴蕭蕭北風厲沙邊鴈鷺泊宿處蒹葭蔽圓月逗前
浦孤琴又搖曳冷然夜遂深白露霑人袂

霽色

清音

昭君墓

漢宮豈不死異域傷獨沒萬里馱黃金蛾眉為枯骨迴

車夜出塞立馬皆不發共恨丹青人墳上哭明月

三四
恨情

弔王將軍墓

嫖姚北伐時深入幾千里戰餘落日黃軍敗鼓聲死嘗
聞漢飛將可奪單于壘今與山鬼鄰殘丘哭遼水

三四古
色黯淡

夢太白西峯

夢寐升九崖杳靄逢元君遺我太白峯寥寥辭垢氛結

宇在星漢宴林閉氤氲檐楹覆餘翠巾鳥生片雲時往
谿谷間孤亭晝仍曛松峯引天影石瀨清霞文恬目緩
舟趣霽心投鳥羣春風又搖櫂潭島花紛紛

晦日馬鎧曲稍次中流作

夜寒宿蘆葦曉色明西林初日在川上便澄遊子心晴
天無纖翳郊野浮春陰波靜隨釣魚舟小綠水深出浦
見千里曠然諧遠尋扣船應漁父同唱滄浪吟

湖中晚霽

湖廣舟自輕江天欲澄霽是時清楚望氣色猶霾曠
踟金霞白波上日初麗煙虹落鏡中樹木生天際杳杳
涯欲辨蒙蒙雲復閉言乘星漢明又覩寰瀛勢微興從
此愜悠然不知歲試歌滄浪清遂覺乾坤細豈念客衣
薄將期永投袂遲迴漁父間一鴈聲嘹唳

附江上琴興
江上調玉琴一絃清一心冷冷七絃
遍萬木澄幽陰能使江月白又令江水深始知枯桐
枝可以徽黃金一絃清一心此語殊謬
可笑能使江月白又令江水深亦無謂

七言古詩

古意

井底玉冰洞地明琥珀轆轤青絲索仙人騎鳳披彩霞
挽上銀瓶照天閣黃金作身雙飛龍口銜明月噴芙蓉
一時渡海望不見曉上青樓十二重

五言律詩

題破山寺後院

清晨入古寺初日照高林竹逕通幽處禪房花木深
山光悅鳥性潭影空人心萬籟此俱寂但餘鐘磬音

三四清
韵自然

七言絕句

塞下曲

玉帛朝回望帝鄉
烏孫歸去不稱王
天涯靜處無征戰
兵氣銷為日月光

北海陰風動地來
明君祠上望龍堆
髑髏皆是長城卒
日暮沙場飛作灰

氣
盡

塞下

鐵馬胡裘出漢營
分麾百道救龍城
左賢未遁旌竿折
過在將軍不在兵

特
想

送宇文六

花映垂楊漢水清
微風林裏一枝輕
即今江北還如此
愁殺江南離別情

三日尋李九莊

雨歇楊林東渡頭永和三日盪輕舟故人家在桃花岸
直到門前谿水流

後二語清
趣自然

吳故宮

越女歌長君且聽芙蓉香滿水邊城豈知一日終非主
猶自如今有怨聲

唐詩鏡卷十四

欽定四庫全書

唐詩鏡卷十五

明 陸時雍 編

盛唐第七

岑參

南陽人文本之後天寶中進士試大理評事攝監察御史杜甫薦之轉左補闕起居郎累遷侍御史

出為嘉州刺史退居杜陵山中屬中原多故卒死於蜀有集八卷

岑參淺而腴多於點染見佳 高達夫莽而率岑嘉州淺而嫩然高多老氣岑多芬色長短各自有在

五言古詩

初至西號官舍南池呈左右省及南宮諸故人
黜官自西掖待罪臨下陽空積犬馬戀豈思鵝鷺行素
多江湖意偶佐山水鄉滿院池月靜捲簾谿雨涼軒牕
竹翠濕案牘荷花香白鳥上衣桁青苔生筆牀數公不
可見一別盡相忘敢恨青瑣客無情華省郎早年迷進
退晚節悟行藏他日能相訪嵩南舊草堂

至大梁却寄匡城主人

一從棄魚釣十載干明王無由謁天階却欲歸滄浪仲
秋至東郡遂見天雨霜昨日夢故山蕙草色已黃平明
辭鐵丘薄暮遊大梁仲秋蕭條景拔刺飛鵝鷄四郊陰
氛閉萬里無晶光長風吹白茅野火燒枯桑故人南燕
吏籍籍名更香聊以玉壺贈置之君子堂

武威送劉單判官赴安西行營便呈高開府

熱海亘鐵門火山赫金方白草磨天涯胡沙莽茫茫夫
子佐戎幕其鋒利如霜中歲學兵符不能守文章功業

須及時立身有行藏男兒感忠義萬里忘越鄉孟夏邊
候遲胡國草木長馬疾過飛鳥天窮超夕陽都護新出
師五月發軍裝甲兵二百萬錯落黃金光揚旗拂崑崙
伐鼓震蒲昌太白引官軍天威臨大荒西望雲似蛇戎
夷知喪亡渾驅大宛馬繫取樓蘭王曾到交河城風土
斷人腸寒驛遠如點邊烽互相望赤亭多颼風鼓怒不
可當有時無人行沙石亂飄揚夜靜天蕭條鬼哭夾道
傍地上多髑髏皆是古戰場置酒高館夕邊城月蒼蒼

軍中宰肥牛堂上羅羽觴紅淚金燭盤嬌歌豔新妝望
君仰青冥短翮難可翔蒼然西郊道握手何慨慷

後段語
色叢叢

送王大昌齡赴江寧

對酒寂不語悵然悲送君明時不得用白首徒攻文澤
國從一官滄波幾千里羣公滿天闕獨去過淮水舊家
富春渚嘗憶卧江樓自聞君欲行頻望南徐州窮巷獨
閉門寒燈靜深屋北風吹微雪抱被肯同宿君行到京

口正是桃花時舟中饒孤興湖上多新詩潛虬且深蟠
黃鵠舉未晚惜君青雲器努力加餐飯

一起感甚二
段情色具足

送祁樂歸河東

祁樂後來秀挺身出河東往年詣驪山獻賦溫泉宮天
子不召見揮鞭遂從戎前月還長安囊中金已空有時
忽乘興畫出江上峰牀頭蒼梧雲簾下天台松忽如高
堂上颯颯生清風五月火雲屯氣燒天地紅鳥且不敢

飛子行如轉蓬少華與首陽隔河勢爭雄新月河上出
清光滿關中置酒灞亭別高歌披心胷君到故山時為

謝五老翁

下語如
轉蓬

北庭貽宗學士道別

萬事不可料歎君在軍中讀書破萬卷何事來從戎曾
逐李輕車西征出太蒙荷戈月窟外擐甲崑崙東兩度
皆破胡朝廷輕戰功十年祇一命萬里如飄蓬容鬢老

胡塵衣裘脆邊風忽來輪臺下相見披心胷飲酒對春
草彈碁聞夜鐘今且還龜茲臂上懸角弓平沙向旅館
匹馬隨飛鴻孤城倚大磧海氣迎邊空四月猶自寒天
山雪濛濛君有賢主將何為泣途窮時來整六翮一舉
凌蒼穹

起語
咄咄

送狄員外巡按西山軍

兵馬守西山中國非得計不知何代策空使蜀人弊八

州崖谷深千里雲雪閉泉澆閣道滑水凍繩橋脆戰士
常苦饑糗糧不相繼胡兵猶不歸空山積年歲儒生識
損益言事皆審諦狄子幕府郎有謀必康濟胸中懸明
鏡照耀無巨細莫辭冒險艱可以裨節制相思江樓夕
愁見月澄霽

語具
經濟

登嘉州凌雲寺作

寺出飛鳥外青峰戴朱樓搏壁躋半空喜得登上頭始

知宇宙闊下看三江流天晴見峨眉如向波上浮迴曠
煙景豁陰森棕枿稠願割區中緣永從塵外遊迴風吹
虎穴片雨當龍湫僧房雲濛濛夏月寒飈飈迴合俯近
郭寥落見遠舟勝槩無端倪天宮可淹留一官詎足道
欲去令人愁

與高適薛據登慈恩寺浮圖

塔勢如湧出孤高聳天宮登臨出世界磴道盤虛空突
兀壓神州崢嶸如鬼工四角礙白日七層摩蒼穹下窺

指高鳥俯聽聞驚風連山若波濤奔湊似朝東青槐夾
馳道宮館何玲瓏秋色從西來蒼然滿關中五陵北原
上萬古青濛濛淨理了可悟勝因夙所宗誓將挂冠去
覺道資無窮

形狀絕色語氣復雄秋色從西來蒼然滿關中
五陵北原上萬古青濛濛登高俯下一覽皆了

出關經華嶽寺訪法華雲公

野寺聊解鞍偶見法華僧開門對西嶽石壁青稜層竹
徑厚蒼苔松門盤紫藤長廊列古畫高殿懸孤燈五月

山雨熱三峯火雲蒸側聞樵人言深谷猶積冰久願尋
此山至今嗟未能謫官忽東走王程苦相仍欲去戀雙
樹何由窮一乘月輪吐山郭夜色空清澄

春半與羣公同遊元處士別業

郭南處士宅門外羅羣峯勝槩忽相引春華今正濃山
厨竹裏爨野碓藤間春對酒雲數片捲簾花萬重巖泉
嗟到晚州縣欲歸慵草色帶朝雨灘聲兼夜鐘愛茲清
俗慮何事老塵容況有林下約轉懷方外蹤

對酒雲數片捲簾花萬重最是佳句
草色帶朝雨灘聲兼夜鐘亦不落莫

陪羣公龍岡寺泛舟

漢水天一色寺樓波底看鐘鳴長空夕月出孤舟寒映
酒見山火隔簾聞夜灘紫鱗掣芳餌紅燭然金盤良友
興正愜勝遊情未闌此中堪倒載須盡主人歡

三四

句佳

終南山雙峯草堂作

斂跡歸山田息心謝時輩晝還草堂卧但與雙峯對興

來恣佳遊事恆符勝槩著書高牕下日夕見城內曩為
世人誤遂負平生愛久與林壑辭及來松杉大偶茲精
廬近數預名僧會有時逐樵漁盡日不冠帶崖口上新
月石門破蒼靄色向羣木深光搖一潭碎緬懷鄭生谷
頗憶嚴子瀨勝事猶可追斯人邈千載

景趣
清絕

過緱山王處士黑石谷隱居

舊居緱山下偏識緱山雲處士久不還見雲如見君別

來逾十秋兵馬日紛紛青谿開戰場黑谷屯行軍遂令
巢由輩遠逐麋鹿羣獨有南澗水潺湲如昔聞

起處意
致絕佳

尋鞏縣南李處士別業

先生近南郭茅屋臨東川桑葉隱村戶蘆花映釣船有
時著書暇盡日窻中眠且喜間井近灌田同一泉

幽趣

過王判官西津所居

勝迹不在遠愛君池館幽素懷巖中諾宛得塵外遊何
必到清谿忽來見滄洲潛移岷山石暗引巴江流樹密
晝先夜竹深夏已秋沙鳥上筆牀谿花簪簾鉤夫子賤
簪冕注心向林丘落日出公堂垂綸乘釣舟賦詩憶楚
老載酒隨江鷗翛然一傲吏獨在西津頭

樹密晝先夜四
語寫景得佳

秋夕聽羅山人彈三峽流泉

皤皤岷山老抱琴鬢蒼然衫袖拂玉蕊為彈三峽泉此

曲彈未半高堂如空山石林何魑魅忽在牕戶間繞指
弄嗚咽青絲激潏潏演漾怨楚雲虛徐韻秋煙疑兼陽
臺雨似雜巫山猿幽引鬼神聽淨令耳目便楚客腸欲
斷湘妃淚斑斑誰裁青桐枝絙以朱絲絃能含古人曲
遞與今人傳知音難再逢惜君方老年曲終月已落惆
悵東齋眠

七言古詩

客舍悲秋有懷兩省舊遊呈幕中諸公

三度爲郎便白頭一從出守五經秋
莫言聖主長不用其那蒼生應未休
人間歲月如流水客舍秋風今又起
不知心事向誰論江上蟬鳴空滿耳

青門歌送東臺張判官

青門金鎖平旦開城頭日出使車回
青門柳枝正堪折路傍一日幾人別
東出青門路不窮驛樓官樹灞陵東
花撲征衣看似錦雲隨去馬色疑驄
胡姬酒壚日未午絲繩玉缸酒如乳
灞頭落花沒馬蹄昨夜微雨花成泥

黃鸝翅濕飛轉低關東尺書醉嬾題須臾望君不可見
揚鞭飛鞚疾於箭借問使乎何時來莫作東飛百勞西
飛燕

七言古才氣苦頓便似有空張之勢語氣更益不老

秦箏歌送外甥蕭正歸京

汝不聞秦箏聲最苦五色纏絃十三柱怨調慢聲如欲
語一曲未終日移午紅亭水木不知暑忽彈黃鍾和白
紵清風颯來雲不去聞之酒醒淚如雨汝歸秦兮彈秦

聲秦聲悲兮聊送汝

最喜結二

語老潔

燉煌太守後庭歌

燉煌太守才且賢
郡中無事高枕眠
太守到來山出泉
黃砂磧裏人種田
燉煌耆舊鬢皓然
願留太守更五年
城頭月出星滿天
曲房置酒張錦筵
美人紅妝色正鮮
側垂高髻挿金鈿
醉坐藏鉤紅燭前
不知鉤在若箇邊
為君手把珊瑚鞭
射得半段黃金錢
此中樂事亦已偏

太白胡僧歌

并序

太白中峯絕頂有胡僧不知幾百歲眉長數寸身不
製繒帛衣以草葉恒持楞伽經雲壁迴絕人迹罕到
嘗東峰有鬪虎弱者將死僧杖而解之西湫有毒龍
久而為患僧器而貯之商山趙叟前年采茯苓深入
太白偶值此僧訪我而說予恒有獨往之意聞而悅
之乃為歌曰

聞有胡僧在太白蘭若去天三百尺一持楞伽入中峰

世人難見但聞鐘牕邊錫杖解兩虎牀下鉢孟藏一龍
草衣不針復不線兩耳垂肩眉覆面此僧年幾那得知
手種青松今十圍心將流水同清淨身與浮雲無是非
商山老人已曾識願一見之何由得山中有僧人不知
城裏看山空黛色

田使君美人舞如蓮花北鋌歌

美人舞如蓮花旋世人有眼應未見高堂滿地紅氍毹
試舞一曲天下無此曲胡人傳入漢諸客見之驚且歎

慢臉嬌娥纖復穠
輕羅金縷花蔥籠
回裾轉袖若飛雪
左鋌右鋌生旋風
琵琶橫笛和未匝
花門山頭黃雲合
忽作出塞入塞聲
白草胡沙寒颯颯
翻身入破如有神
前見後見回回新
始知諸曲不可比
采蓮落梅徒聒耳
世人學舞祇是舞
恣態豈能得如此

韋員外家花樹歌

今年花似去年好
去年人到今年老
始知人老不如花
可惜落花君莫掃
君家兄弟不可當
列卿御史尚書郎

朝回花底恒會客花撲玉缸春酒香

流麗足

膾人口

玉門關蓋將軍歌

蓋將軍真丈夫行年三十執金吾身長七尺頗有鬚玉
門關城迴且孤黃沙萬里白草枯南鄰犬戎北接胡將
軍到來備不虞五十甲兵膽力麤軍中無事但歡娛暖
屋繡簾紅地爐織成壁衣花毵毹燈前侍婢瀉玉壺金
鎗亂點野酤酥紫紱金章左右趨問著只是蒼頭奴美

人一雙閒且都朱唇翠眉映明矚清歌一曲世所無今
日喜聞鳳將雛可憐絕勝秦羅敷使君五馬漫踟躕野
草繡窠紫羅襦紅牙縷馬對擣菹玉盤纖手撒作盧衆
中誇道不曾輸櫪上昂昂皆駿駒桃花叱撥價最殊騎
將獵向城南隅臘日射殺十年狐我來塞外按邊儲為
君取醉酒刺沽醉爭酒盞相喧呼忽憶咸陽舊酒徒

送魏升卿擢第歸東都因懷魏校書陸渾喬潭

升卿一
作叔虹

井上桐葉雨灑亭卷秋風故人適戰勝匹馬歸山東問
君今年三十幾能使香名滿人耳君不見三峰直上五
千仞見君文章亦如此如君兄弟天下稀雄辭健筆皆
若飛將軍金印綬紫綬御史鐵冠重繡衣喬生作尉別
來久因君為問平安否魏侯校理復何如前日人來不
得書陸渾山下佳可賞蓬閣閒時日應往自料青雲未
有期誰知白髮偏能長壚頭青絲白玉瓶別時相顧酒
如傾搖鞭舉袂忽不見千樹萬樹空蟬鳴

西亭子送李司馬

高高亭子郡城西直上十尺與雲齊盤崖緣壁試攀躋
羣山向下飛鳥低使君五馬天半嘶絲繩玉壺為君提
坐來一望無端倪紅花綠柳鶯亂啼千家萬井連迴谿
酒行未醉聞暮雞點筆操紙為君題為君題惜解攜草
萋萋沒馬蹄

未數
語韵

登古鄴城

下馬登鄴城城空復何見東風吹野火暮入飛雲殿城隅南對望陵臺漳水東流不復回武帝宮中人去盡年年春色為誰來

邯鄲客舍歌

客從長安來驅馬邯鄲道傷心叢臺下一帶生蔓草客舍門臨漳水邊垂楊下繫釣魚船邯鄲女兒夜沽酒對客挑燈誇數錢酩酊醉時日正午一曲狂歌壚上眠

優鉢羅花歌

并序

參嘗讀佛經聞有優鉢羅花目所未見天寶庚申歲
參忝大理評事攝監察御史領伊西北庭度支副使
自公多暇乃於府庭內栽樹種藥為山鑿池婆娑乎
其間足以寄傲交河小吏有獻此花者云得之於天
山之南其狀異於衆草勢寵從如冠弁巍然上聳生
不傍引攢花中折駢葉外包異香騰風秀色媚景因
賞而歎曰爾不生於中土僻在遐裔使牡丹價重芙
蓉譽高惜哉夫天地無私陰陽無偏各遂其生自物

厥性豈以偏地而不生乎豈以無人而不芳乎適此
花不遭小吏終委諸山谷亦何異懷才之士未曾明
主擯於林藪邪因感而為歌歌曰

白山南赤山北其間有花人不識綠莖碧葉好顏色葉
六瓣花九房夜掩朝開多異香何不生彼中國兮生西
方移根在庭媚我公堂恥與衆草之為伍何亭亭而獨
芳何不為人之所賞兮深山窮谷委嚴霜吾竊悲陽關
道路長曾不得獻於君王

喜其語有節制一
縱則無所不之矣

五言律詩

歲暮磧外寄元撫

西風傳戍鼓南望見前軍
沙磧人愁月山城犬吠雲
別家逢逼歲出塞獨離羣
髮到陽關白書今遠報君

山城犬吠雲
景有餘況

七月三日在內學見有高道舉徵宿關西客舍
寄東山嚴許二山人

雲送關西雨風傳渭北秋孤燈然客夢寒杵搗鄉愁灘
上思嚴子山中憶許由蒼生今有望飛詔下林丘

三四小巧其格遂降詩以
一字爭奇者非上品也

號州送天平何丞入京市馬

關樹晚蒼蒼長安近夕陽回風醒別酒細雨濕行裝習
戰邊塵黑防秋塞草黃知君市駿馬不是學燕王

三四乃盛
唐氣格

終南東谿中作

谿水碧於草潺潺花底流沙平堪濯足石淺不勝舟洗
藥朝與暮釣魚春復秋興來從所適還欲向滄洲

語語
清純

高冠谷口招鄭鄩

冠一作官

谷口來相訪空齋不見君澗花然暮雨潭樹煖春雲
徑稀人迹簷峰下鹿羣衣裳與枕席山靄碧氛氲

巴南舟中夜書事

渡口欲黃昏歸人爭渡喧近鐘清野寺遠火點江村見

鴈思鄉信聞猿積淚痕孤舟萬里外秋月不堪論

近鐘清野寺清

字亦未得力

附長門怨 君王嬖妾妬閑妾在長門舞袖垂新寵
愁眉結舊恩 綠錢生履跡紅粉濕啼痕羞被桃花笑
看春獨不言 愁眉結舊恩此即淚落故情留之轉
句岑特尖巧 丘中春卧竹深喧暮鳥花缺露春山露
字俚意不
若補字佳

附登總持閣 高閣逼諸天登臨近日邊晴開萬井
樹愁看五陵煙檻外低秦嶺牕中小渭川早知清淨

理常願

奉金仙

附送張子尉南海 不擇南州尉高堂有老親樓臺
重蜃氣邑里雜鮫人海暗三山雨花明五嶺春此鄉

多寶玉慎

莫厭清貧

附武威春暮聞宇文判官西使還已到晉昌
片雨過城頭黃鸝上戍樓塞花飄客淚邊柳挂鄉愁白髮悲明鏡青春換敵裘君從萬里使聞已到瓜州

附江行夜宿龍吼灘臨眺思峨眉
官舍臨江口灘聲已慣聞水煙晴吐月山火夜燒雲且欲尋方士無心戀使君異鄉何可住況復久離羣

七言律詩

奉和中書舍人賈至早朝大明宮

雞鳴紫陌曙光寒鶯囀皇州春色闌
金闕曉鐘開萬戶

玉階仙仗擁千官
花迎劍珮星初落
柳拂旌旗露未乾
獨有鳳凰池上客
陽春一曲和皆難

唐人早朝詩以岑參為上中
聯冠冕整齊抑更工雅之至

和祠部王員外雪後早朝即事

長安雪後似春歸
積素凝華連曙暉
色借玉珂迷曉騎
光添銀燭晃朝衣
西山落月臨天仗
北闕晴雲捧禁闈
聞道仙郎歌白雪
由來此曲和人稀

張說偃松篇名接天庭多景色氣隣宮闕借氛氲
岑參早朝色借玉珂迷曉騎光添銀燭晃朝衣皆

傍映法天下之衝正鋒降
大敵自非神武不與也

奉和杜相公發益昌

相國臨戎別帝京
擁麾持節遠橫行
朝登劍閣雲隨馬
夜渡巴江雨洗兵
山花萬朶迎征蓋
川柳千條拂去旌
暫到蜀城應計日
須知明主待持衡

使君席夜送嚴河南赴長水

得時字

嬌歌急管雜青絲
銀燭金杯映翠眉
使君地主能相送
河尹天明坐莫辭
春城月出人皆醉
野戍花深馬去遲

寄聲報爾山翁道今日河南勝昔時

三四敗格五六

景味彷彿王維

暮春號州東亭送李司馬歸扶風別廬

柳彈鶯嬌花復殷紅亭綠酒送君還到來函谷愁中月
歸去碯谿夢裏山簾前春色應須惜世上浮名好是閒
西望鄉關腸欲斷對君衫袖淚痕斑

到來函谷愁中月歸去碯谿夢裏山少陵當此不
直道出愁夢二字體勢氤氳氣象盤礴在作用之
間矣

西掖省即事

西掖重雲開曙暉
北山疎雨點朝衣
千門柳色連青瑣
三殿花香入紫微
平明端笏陪鵷列
薄暮垂鞭信馬歸
官拙自悲頭白盡
不如巖下掩荆扉

首春渭西郊行呈藍田張二主簿

迴風度雨渭城西
細草新花踏作泥
秦女峯頭雪未盡
胡公陂上日初低
愁窺白髮羞微祿
悔別青山憶舊谿
聞道輞川多勝事
玉壺春酒正堪攜

五六故

作情態

五言排律

送盧郎中除杭州赴任

罷起郎官草初分刺史符海雲迎過楚江月引歸吳城
底濤聲震樓端蜃氣孤千家窺驛舫五馬飲春湖柳色
供詩用鶯聲送酒須知君望鄉處枉道上姑蘇

大則雅小則巧岑參多以巧用如山鳥
驚吹笛江猿看洗兵絕不入大家體料

六月三十日水亭送華陰王少府還縣

得潭字

亭晚人將別池涼酒未酣關門勞夕夢仙掌引歸驂荷
葉藏魚艇藤花罨客簪殘雲收夏暑新雨帶秋嵐失路
情無適離懷思不堪賴茲庭戶裏別有小江潭

殘雲二語
輕快可人

早秋與諸子登虢州西亭觀眺

亭高出鳥外客到與雲齊樹點千家小天圍萬嶺低殘
虹挂陝北急雨過關西酒榼緣青壁瓜田傍綠谿微官
何足道愛客且相攜唯有鄉園處依望不迷

三四

語尖

五言絕句

憶長安曲寄龐淮

東望望長安正值日初出長安不可見喜見長安日

七言絕句

獻封大夫破播仙凱歌

漢將承恩西破戎捷書先奏未央宮天子預開麟閣待

祇今誰數貳師功

日落轅門鼓角鳴
千羣面縛出蕃城
洗兵魚海雲迎陣
秣馬龍堆月照營

題苜蓿峯寄家人

苜蓿峯邊逢立春
胡蘆河上淚沾巾
閨中只是空相憶
不見沙場愁殺人

玉關寄長安李主簿

東去長安萬里餘
故人何惜一行書
玉關西望堪腸斷
況復明朝是歲除

武威送劉判官赴磧西行軍

火山五月行人少
看君馬去疾如鳥
都護行營太白西
角聲一動胡天曉

虢州後亭送李判官使赴晉絳

得秋字

西原驛路挂城頭
客散紅亭雨未收
君去試看汾水上
白雲猶似漢時秋

後二語
似直

送崔子還京

匹馬西從天外歸，揚鞭只共鳥爭飛。
送君九月交河北，雪裏題詩淚滿衣。

山房春事

梁園日暮亂飛鴉，極目蕭條三兩家。
庭樹不知人去盡，春來還發舊時花。

三句
不老

逢入京使

故園東望路漫漫，雙袖龍鍾淚不乾。
馬上相逢無紙筆，

憑君傳語報平安

唐詩鏡卷十五

欽定四庫全書

唐詩鏡卷十六

明 陸時雍 編

盛唐第八

李頎

東川人開元十三年賈
季鄰榜進士調新鄉尉

五言古詩

裴尹東谿別業

公才廊廟器官亞河南守別墅臨都門驚湍激前後舊

交與羣從十日一攜手幅巾望寒山長嘯對高柳清歡
信可尚散吏亦何有岸雪青城陰水光遠林首閑觀野
人筏或飲川上酒幽雲澹徘徊白鷺飛左右庭竹垂卧
內村煙隔南阜始知物外情簪紱同芻狗

附題合歡 間花復卷葉艷眼又驚心蝶遠西
枝露風披東幹陰黃衫漂細藥時拂女郎砧

七言古詩

古從軍行

白日登山望烽火黃昏飲馬傍交河行人刁斗風沙暗

公主琵琶幽怨多野雲萬里無城郭雨雪紛紛連大漠
胡鴈哀鳴夜夜飛胡兒眼淚雙雙落聞道玉門猶被遮
應將性命逐輕車年年戰骨埋荒外空見蒲桃入漢家

後二語
可諷

古行路難

漢家名臣揚德祖四代五公享茅土父子兄弟綰銀黃
躍馬鳴珂朝建章火浣單衣繡方領茱萸錦帶玉盤囊
賓客填街復滿座片言出口生輝光世人逐勢爭奔走

瀝膽竊肝惟恐後當時一顧登青雲自謂生死長隨君
一朝謝病還鄉里窮巷蒼苔絕知己秋風落葉閉重門
昨日論交竟誰是薄俗嗟嗟難重陳深山麋鹿可為鄰
魯連所以蹈東海古往今來稱達人

饒有
風格

送陳章甫

四月南風大麥黃棗花未落桐陰長青山朝別暮還見
嘶馬出門思舊鄉陳侯立身何坦蕩虬鬚虎眉仍大顙

腹中貯書一萬卷不肯低頭在草莽東門酤酒飲我曹
心輕萬事如鴻毛醉卧不知白日暮有時空望孤雲高
長河浪頭連天黑津吏停舟渡不得鄭國遊人未及家
洛陽行子空歎息聞道故林相識多罷官昨日今如何

一起

韵古

聽安萬善吹箏歌

南山截竹為箏篴此樂本自龜茲山流傳漢地曲轉奇
涼州胡人為我吹傍鄰聞者多歎息遠客思鄉皆淚垂

卷十六
世人解聽不解賞長飈風中自來往枯桑老柏寒飈颼
九雛鳴鳳亂啾啾龍吟虎嘯一時發萬籟百泉相與秋
忽然更作漁陽摻黃雲蕭條白日暗變調如聞楊柳春
上林繁花照眼新歲夜高堂列明燭美酒一杯聲一曲

鄭櫻桃歌

石季龍僭天祿擅雄豪美人姓鄭名櫻桃櫻桃美顏香
且澤娥娥侍寢專宮掖後庭卷衣三萬人翠眉清鏡不
得親宮軍女騎一千匹繁花照耀漳河春織成花映紅

綸巾紅旗掣曳鹵簿新鳴輦走馬接飛鳥銅馱瑟瑟隨
去塵鳳陽重門如意館百尺金梯倚銀漢自言富貴不
可量女為公主男為王赤花雙簾珊瑚牀盤龍斗帳璠
珀光淫昏偽位神所惡滅石者陵終不悟鄴城蒼蒼白
露微世事翻覆黃雲飛

老

五言律詩

送竇參軍

城南送歸客舉酒對林巒
暄鳥迎風轉春衣度雨寒
桃花開翠幕柳色拂金鞍
公子何時至無令芳草闌

春衣句
有風味

七言律詩

寄司勳盧員外

流澌臘月下河陽
草色新年發建章
秦地立春傳太史
漢宮題柱憶仙郎
歸鴻欲度千門雪
侍女新添五夜香
早晚薦雄文似者
故人今已賦長楊

五六語

有芬氣

寄綦母三

新加大邑綬仍黃近與單車去洛陽
顧眄一過丞相府
風流三接令公香
南川稷稻花侵縣
西嶺雲霞色滿堂
共道進賢蒙上賞
看君幾歲作臺郎

西嶺句

有色

送魏萬之京

朝聞遊子唱離歌
昨夜微霜初渡河
鴻鴈不堪愁裏聽

雲山況是客中過
闕城樹色催寒近
御苑砧聲向晚多
莫見長安行樂處
空令歲月易蹉跎

五六老秀結
語寄况無限

送李回

知君官屬大司農
詔幸驪山職事雄
歲發金錢供御府
晝看仙液注離宮
千巖曙雪旌門上
十月寒花輦路中
不覩聲名與文物
自傷流滯去關東

十月句

芬葉

宿瑩公禪房聞梵

花宮仙梵遠微微
月隱高城鐘漏稀
夜動霜林驚落葉
曉聞天籟發清機
蕭條已入寒空靜
肥沓仍隨秋雨飛
始覺浮生無住着
頓令心地欲皈依

不精亦
得不但

題璿公山池

遠公遊跡廬山岑
開山

一本
作士

幽居祇樹林
片石孤峯窺

色相清池皓月照
禪心指揮如意天
花落坐卧間房春

草深此外俗塵俱不染惟餘玄度得相尋

五六語境

最是自得

題盧五舊居

物在人亡無見期
閒庭繫馬不勝悲
窻前綠竹生空地
門外青山如舊時
悵望秋天鳴墜葉
嶺岼枯柳宿寒鷗
憶君淚落東流水
歲歲花開知是誰

五六作

法老氣

李頎七律詩格清鍊復流
利可誦是摩詰以下一人

詩欲句句鍊字字靈若漫下一語非泛即死矣嘗
揆諸名家句如支遁買山情漫切曇摩泛海路空
長是幫襯語飛蘿半拂銀題榜瀑布環流玉砌陰
是活套語細草偏承回輦處飛花故落舞鵲前是
妝扮語鳳凰樓下交天仗烏鵲橋邊敵御筵是堆
垛語黃河磧裏砂為岸白馬津邊柳向城是支應
語武帝祠前雲欲散仙人掌上雨初晴是救急語
鴻雁不堪愁裏聽雲山況是客中過是湊疊語月
到上方諸品靜心持半偈萬緣空是學究語吳宮
芳草埋幽徑晉代衣冠成古丘體面語戎馬不如
歸馬逸千家今有百家存是村莊語錦江春色來
天地玉壘浮雲變古今是虛張語高江急峽雷霆
關古木蒼藤日月昏是驚詫語莊生曉夢迷蝴蝶
望帝春心托杜鵑是詛謎語律詩語氣欲疑體
格欲整鴻鴈不堪愁裏聽雲山況是過中過只
言啼鳥堪求侶無奈東風欲送行便覺敗格

五言排律

宿香山寺石樓

夜宿翠微半高樓聞暗泉漁舟帶遠火山磬發孤煙衣
拂雲松外門清河漢邊峯巒低枕席世界接人天靄靄
花出霧輝輝星映川東林曙鶯滿惆悵欲言旋

山磬發孤煙

最有景色

附聖善閣藥草空

階靜梧桐返照寒

七言絕句

百花原

百花原頭望京師黃河水流無已時秋天曠野行人絕

馬首東來知是誰

祖詠

洛陽人開元十三年進士張說在并州引為駕部員外郎

祖詠氣格卑下是詩家第

一大病思雖工總不入雅

五言律詩

蘇氏別業

別業居幽處到來生隱心南山當戶牖澧水映園林竹

金定四庫全書
卷十六
覆經冬雪庭昏未夕陰寥寥人境外間坐聽春禽

景趣
幽絕

題韓少府水亭

梅福幽棲處佳期不忘還鳥啼當戶竹花繞傍池山水
氣侵階冷松陰覆座間寧知武陵趣宛在市朝間

三四
景佳

江南旅情

楚山不可極歸路但蕭條海色晴看雨江聲夜聽潮劍

留南斗近書寄北風遙為報空潭橋無媒寄洛橋

泊揚子津

纔入維揚郡鄉關此路遙林藏初過雨風退欲歸潮江
火明沙岸雲帆礙浦橋客衣今正薄寒氣近來饒

三四苦思然却少色故景
有所不賦者此類是也

七言律詩

望薊門

燕臺一望客心驚蕭鼓喧喧漢將營萬里寒光生積雪

三邊曙色動危旌沙場烽火連胡月海畔雲山擁薊城
少小雖非投筆吏論功還欲請長纓

五言排律

清明宴司勳劉郎中別業

田家復近臣行樂不違親霽日園林好清明烟火新以
文長會友唯德自成鄰池照牕陰晚杯香藥味春簷前
花覆地竹外鳥窺人何必桃源裏深居作隱淪

得杯香藥味春
一語稍破俗韻

萬楚

紀事云登開元進士第
李頎有東郊寄楚詩

五言絕句

河上逢落花

河水浮落花
花流東不息
應見浣紗人
為道長相憶

王之渙

并州人與兄之咸之賁皆有文名與
王昌齡崔國輔睽唱迭和名動一時

五言絕句

送別

楊柳東風樹青青
夾御河近來攀折苦
應為別離多

七言絕句

涼州詞

黃河遠上白雲間一片孤城萬仞山羌笛何須怨楊柳

春光不度玉門關

集異記云開元中王之渙與王昌齡高適齊名共詣旗亭貰酒小飲有梨園

伶官十數人會讌三人因避席隈映擁爐以觀焉俄有妙妓四輩奏樂皆當時名部昌齡等私相約曰我輩各擅詩名每不自定甲乙今者可以密觀諸伶所謳若詩入歌詞之多者為優初謳昌齡詩次謳適詩又次復謳昌齡詩渙之自以得名已久因指諸妓中最佳者曰待此子所唱如非我詩即終身不敢與子爭衡次至雙鬟發聲果謳黃河云云因大諧笑諸伶詣問因語其事乃競拜乞就筵席三人從之飲醉竟日

羌笛何須怨楊柳春光不度玉門關
此是怨調思巧格老跨絕人遠矣

九日送別

薊庭蕭瑟故人稀何處登高且送歸
今日暫同芳菊酒
明朝應作斷蓬飛

賈至

字幼鄰洛陽人曾之子擢明經第為單父尉玄宗幸蜀拜起居舍人知制誥帝傳位至讓冊帝曰昔

先天誥命乃父為之今又爾為之兩朝盛典出卿家父子手可謂繼美累封信都縣伯以右散騎常侍卒
諡曰文

七言律詩

早朝大明宮呈兩省僚友

銀燭朝天紫陌長
禁城春色曉蒼蒼
千條弱柳垂青瑣
百轉流鶯繞建章
劍珮聲隨玉墀步
衣冠身惹御爐香
共沐恩波鳳池上
朝朝染翰侍君王

早朝諸作此為下
品以語格不老

七言絕句

春思

草色青青柳色黃
桃花歷亂李花香
東風不為吹愁去

春日偏能惹恨長

後二語只愁恨二字如此
叠來却有許多煩惱意在

送南給事貶崖州

疇昔丹墀與鳳池
即今相見兩相悲
朱崖雲夢三千里
欲別俱為慟哭時

送李侍郎赴常州

雪晴雲散北風寒
楚水吳山道路難
今日送君須盡醉
明朝相憶路漫漫

西亭春望

日長風煖柳青青北鴈歸飛入窅冥
岳陽城上聞吹笛能使春心滿洞庭

渾然

居勝

崔國輔

吳郡人明皇時應縣令舉授許昌令累遷集賢直學士禮部員外郎後坐王鉞近親貶晉陵郡

司馬

五言絕句

怨詞

妾有羅衣裳秦王在時作為舞春風多秋來不堪着

語意

古

古意二首

玉籠薰繡裳着罷眠洞房不能春風裏吹却蘭麝香
種棘遮靡蕪畏人來采殺比至狂夫還看看幾花發

長信草

一作
宮

長信宮中草年年愁處生故侵珠履跡不使玉階行

長樂少年行

一作
古意

遺却珊瑚鞭白馬驕不行章臺折楊柳春日路傍情

絕好少

年情色

湖南曲

湖南送君去湖北送君歸湖裏鴛鴦鳥雙雙他自飛

中流曲

歸來日尚早更欲向芳洲渡口水流急迴船不自由

采蓮

玉淑花爭發金塘水亂流相逢畏相失並着采蓮舟

子夜冬歌

寂寥抱冬心裁羅又裝裝夜久頻挑燈霜寒剪刀冷

崔曙

宋州人開元二十六年登進士第以試明堂火珠詩得名

五言古詩

早發交崖山還太室作

東林氣微白寒鳥忽高翔吾亦自茲去北山歸草堂仲
冬正三五日月遙相望肅肅過潁上矔矔辨少陽川冰
生積雪野火出枯桑獨往路難盡窮陰人易傷傷此無

衣客如何蒙雨霜

少字疑誤世無少陽語或是早字

氣爽

附途中晚發

曉霧長風裏勞歌赴遠期雲輕歸海

疾月滿下山遲旅望因高盡鄉心遇物悲故林遙
不見況在落花時
三四亦在景所不賦之列

綦母潛

字季通荆南人開元十四年舉進士由宜壽尉入為集賢待制遷右拾遺終著作郎

五言律詩

宿龍興寺

香剎夜忘歸松清古殿扉燈明方丈室珠繫比丘衣
白日傳心靜青蓮喻法微
天花落不盡處處鳥銜飛

張潮

一作張朝曲
阿人處士

五言古詩

長干行

李白集載此詩而黃魯直辨為李益作
及攷並集亦無此作按顧陶類詩作張

潮或有
所據

憶妾深閨裏煙塵不曾識嫁與長干人沙頭候風色五
月南風興思君下巴陵八月西風起想君發揚子去來
悲如何見少離別多湘潭幾日到妾夢越風波昨夜狂
風度吹折江頭樹森森暗無邊行人在何處好乘浮雲

驄佳期蘭渚東鴛鴦綠浦上翡翠錦屏中自憐十五餘
顏色桃花紅那作商人婦愁水復愁風

此詩視太白作有何不及第太白近古此作
近艷耳後人都著意看李杜別作一等論列

七言古詩

襄陽行

玉盤轉明珠君心無定準昨見襄陽客刺說襄陽好無
盡襄漢水岷山垂漢水東流風北吹只言一世長嬌寵
那悟今朝見別離君渡清羌渚知人獨不語妾見鳥栖

林憶君相思深莫作雲間鴻離聲顧倚侶尚如匣中劍
分形會同處是君婦識君情怨君恨君為此行下牀一
宿不可保況乃萬里襄陽城襄陽傳近大堤北君到襄
陽莫回惑大堤諸女兒憐錢不憐德

七言絕句

采蓮詞

朝出沙頭日正紅晚來雲起半江中
賴逢鄰女曾相識並着蓮舟不畏風

視在國輔采蓮
五絕此覺韻饒

江南行

茨菰葉爛別西灣蓮子花開猶未還
妾夢不離江水上
人傳郎在鳳凰山

唐詩鏡卷十六

欽定四庫全書

唐詩鏡卷十七

明陸時雍編

盛唐第九

李白

新唐書云字太白興聖皇帝九世孫其先以罪徙西域神龍初遁還客巴西母夢長庚星而生因名

之十歲通詩書既長喜縱橫術擊劍為任俠輕財重施客任城與孔巢父輩居徂山猿竹谿六逸天寶初至長安賀知章見其文歎曰子謫仙人也言於玄宗召見金鸞殿帝賜食親為調羹有詔供奉翰林白嘗侍帝醉使高力士脫鞵力士耻之摘其詩以激貴妃帝欲官白妃輒沮止白求還山浮遊四方永王璘

辟為從事璘反逃還彭澤璘敗詔流夜郎會赦還尋陽坐事下獄宋若思釋四辟為叅謀未幾辭職李陽冰為當塗令白依之代宗以左拾遺召而白已卒葬青山文宗詔以白歌詩雙吳劍舞張旭草為三絕按舊唐書云白山東人父為任城尉因家焉魏顆李陽冰序其文劉全白撰墓碣皆云廣漢人東蜀楊天惠彭明遺事云白本邑人微時募為縣小吏後棄去隱居大匡山今山有讀書臺非匡廬也有子曰伯禽女曰平陽諸說不同

太白雄姿逸氣縱橫無方所謂天馬行空一息千里曹子建李太白皆不羣之才每恃才之為病其不足處皆在於率率則意味逆淺太白七言樂府接西漢之體制掩六代之才華自傳玄以下未覩其偶至贈荅歌行如風卷雲舒惟意所向氣韵風華種種振絕五言樂府摹古絕佳諸詩率意

而成苦無深趣蘇子由謂之浮花浪蘂此言非無
謂也讀太白詩當得其氣韻之美不求其字句之
奇 五言佳處得
力於國風居多

五言樂府

關山月

明月出天山蒼茫雲海間長風幾萬里吹度玉門關
漢下白登道胡窺青海灣由來征戰地不見有人還
戍客望邊色思歸多苦顏高樓當此夜歎息未應間

一起語
屬感興

長干行

妾髮初覆額折花門前劇郎騎竹馬來遶牀弄青梅同
居長千里兩小無嫌猜十四為君婦羞顏未嘗開低頭
向暗壁千喚不一迴十五始展眉願同塵與灰常存抱
柱信豈上望夫臺十六君遠行瞿塘滌瀨堆五月不可
觸猿聲天上哀門前遲行跡一一生綠苔苔深不能掃
落葉秋風早八月蝴蝶來雙飛西園草感此傷妾心坐
愁紅顏老早晚下三巴預將書報家相迎不道遠直至

長風沙

長風沙地名在池州之鴈汊下八十里

古貌

唐音

獨不見

白馬誰家子黃龍邊塞兒
天山三丈雪豈是遠行時
春蕙忽秋草莎鷄鳴西池
風摧寒櫓響月入霜閨悲
憶與君別年種桃齊蛾眉
桃今百餘尺花落成枯枝
終然獨不見流淚空自知

好感

托

妾薄命

漢帝重阿嬌貯之黃金屋咳唾落九天隨風生珠玉寵
極愛還歇妬深情却踈長門一步地不肯暫迴車雨落
不上天水覆難再收君情與妾意各自東西流昔日笑
蓉花今成斷腸草以色事他人能得幾時好

宋二語善乎風人之怨
朴貌深衷是西漢家數

東海有勇婦

梁山感杞妻慟哭為之傾金石忽變開都由激深情東

海有勇婦何慙蘇子卿學劍越處子超騰若流星捐軀
報夫讐萬死不顧生白刃耀素雪蒼天感精誠十步兩
跳躍三呼一交兵斬首掉國門蹴踏五藏行豁此伉儷
憤粲然大義明北海李使君飛章奏天庭捨罪警風俗
流芳播滄瀛名在列女籍竹帛以光榮淳于免詔獄漢
主為緹縈津妾一棹歌脫父於嚴刑十子若不肖不如
一女英豫讓斬空衣有心竟無成要離殺慶忌壯夫所
素輕妻子亦何辜焚之買虛聲豈如東海婦事立獨揚

名

發揚有餘傳玄泰女
休行尚多本體情色

黃葛篇

黃葛生洛谿黃花自綿
畧青烟蔓長條繚繞幾百尺
閨人費素手采緝作絺綌
縫為絕國衣遠寄日南客
蒼梧大火落暑服莫輕擲
此物雖過時是妾手中跡

大雅

塞上曲

大漢無中策匈奴犯渭橋五原秋草綠胡馬一何驕
命將征西極橫行陰山側燕支落漢家婦女無華色
轉戰渡黃河休兵樂事多蕭條清萬里瀚海寂無波

一起韵度高雅 從容馳驟
大家作當觀其幅濶情深

大堤曲

漢水橫襄陽花開大堤煖佳期大堤下淚向南雲滿
春風復無情吹我夢魂散不見眼中人天長音信斷

甜美

秦女卷衣

天子居未央
妾來卷衣裳
顧無紫宮寵
敢拂黃金牀
水至亦不去
熊來尚可當
微身奉日月
飄若螢火光
願君采葑菲
無以下體妨

出自薊北門行

虜陣橫北荒
胡星耀精芒
羽書速驚電
烽火晝連光
虎竹救邊急
戎車森已行
明主不安席
按劍心飛揚
推轂出猛將
連旗登戰場
兵威衝絕幕
殺氣凌穹蒼
列陣赤

山下開營紫塞傍
孟冬風沙紫旌旗
凋傷畫角悲海
月征衣卷天霜
揮刃斬樓蘭
彎弓射賢王
單于一平蕩
種落自奔亡
收功報天子
歌舞歸咸陽

此詩與北上行視鮑照相距
有幾精緊稍遜博大過之

北上行

北上何所苦
北上緣太行
磴道盤且峻
巉巖凌穹蒼
馬足蹶側石
車輪摧高岡
沙塵接幽州
烽火連朔方
殺氣毒劍戟
嚴風裂衣裳
奔鯨夾黃河
鑿齒屯洛陽
前行無

歸日返顧思舊鄉慘惻冰雪裏悲號絕中腸尺布不掩
體皮膚劇枯桑汲水澗谷阻採薪壠坂長猛虎又掉尾
磨牙皓秋霜草木不可餐饑飲零露漿歎此北上苦傳
驂為之傷何日王道平開顏覩天光

折楊柳

垂楊拂淥水搖艷東風年花明玉闕雪葉煖金牕烟美
人結長想對此心悽然攀條折春色遠寄龍庭前

豫章行

胡風吹代馬北擁魯陽關吳兵照海雪西討何時還半
渡上遼津黃雲慘無顏老母與子別呼天野草間百鳥
繞旌旗悲鳴相追攀白楊秋月苦早落豫章山本為休
明人斬虜素不閑豈惜戰鬪死為君掃穴殫精感石沒
羽豈云憚險艱樓船若鯨飛波蕩落星灣此曲不可奏
三軍鬢成斑

春思

燕草如碧絲秦桑低綠枝當君懷歸日是妾斷腸時春

風不相識何事入羅幃

嘗謂大雅之道有三淡簡溫
每讀太白詩覺深得此致

秋思

春陽如昨日碧樹鳴黃鸝
蕪然蕙草暮颯爾涼風吹天
秋木葉下月冷莎雞悲坐愁
羣芳歇白露凋華滋

子夜四時歌四首

秦地羅敷女采桑綠水邊
素手青條上紅妝白日鮮
蠶饑妾欲去五馬莫留連

鏡湖三百里，菡萏發荷花。
五月西施采，人看隘若耶。
回舟不待月，歸去越王家。

長安一片月，萬戶擣衣聲。
秋風吹不盡，總是玉關情。
何日平胡虜，良人罷遠征。

明朝驛使發，一夜絮征袍。
素手抽針冷，那堪把剪刀。
裁縫寄遠道，幾日到臨洮。

有味外味 每結二語餘情餘韻無窮 秋風吹
不盡總是玉關情此入感歎語意非為萬戶砧聲
賦也

五言古詩

古風

大雅久不作吾哀竟誰陳
王風委蔓草戰國多荆榛
龍虎相啖食兵戈逮狂秦
正聲何微茫哀怨起騷人
揚馬激頽波開流蕩無垠
廢興雖萬變憲章亦已淪
自從建安來綺麗不足珍
聖代復元古垂衣貴清真
羣才屬休明乘運共躍鱗
文質相炳煥衆星羅秋旻
我志在刪述垂輝映千春
希聖如有立絕筆於獲麟

蟾蜍薄太清蝕此瑤臺月圓光虧中天金魄遂淪沒蟬
竦入紫微大明夷朝暉浮雲隔兩曜萬象昏陰霏蕭蕭
長門宮昔是今已非桂蠹花不實天霜下嚴威沈歎終
永夕感我涕沾衣

代馬不思越越禽不戀燕情性有所習土風固其然昔
別鴈門關今戍龍庭前驚沙亂海日飛雪迷胡天蟣蝨
生虎鶻心魂逐旌旆苦戰功不賞忠誠難可宣誰憐李
飛將白首沒三邊

苦戰功不賞忠誠難可宣此是
詩柄起結隱相注令人不覺

咸陽二三月宮柳黃金枝綠幘誰家子賣珠輕薄兒日
暮醉酒歸白馬驕且馳意氣人所仰冶遊方及時子雲
不曉事晚獻長楊辭賦達身已老草玄鬢若絲投閣良
可歎但為此輩嗤

感慨迷蕩歸於和平
所謂有大力者不動

莊周夢蝴蝶蝴蝶為莊周一體更變易萬事良悠悠乃
知蓬萊水復作清淺流青門種瓜人舊日東陵侯富貴

固如此營營何所求

雜沓處行

佛陀公

君平既棄世世亦棄君平觀變窮太易探元化羣生寂寞綴道論空簾閉幽情騶虞不虛來驚鷺有時鳴安知天漢上白日懸高名海客去已久誰人測沉冥

末路感歎

一往情深

胡關饒風沙蕭索竟終古木落秋草黃登高望戎虜荒城空大漠邊邑無遺堵白骨橫千霜嵯峨蔽榛莽借問

誰凌虐天驕毒威武赫怒我聖王勞師事鼙鼓陽和變
殺氣發卒騷中土三十六萬人哀哀淚如雨且悲就行
役安得營農圃不見征戍兒豈知關山苦李牧今不在
邊人飼豺虎

天津三月時千門桃與李朝為斷腸花暮逐東流水前
水復後水古今相續流新人非舊人年年橋上遊鷄鳴
海色動謁帝羅公侯月落西上陽餘輝半城樓衣冠照
雲日朝下散皇州鞍馬如飛龍黃金絡馬頭行人皆辟

易志氣橫嵩丘入門上高堂列鼎錯珍羞香風引趙舞
清管隨齊謳七十紫鴛鴦雙雙戲庭幽行樂爭晝夜自
言度千秋功成身不退自古多愆尤黃犬空歎息綠珠
成鸞讐何如鷓鴣夷子散髮掉扁舟

西嶽蓮花山迢迢見明星素手把芙蓉虛步躡太清霓
裳曳廣帶飄拂昇天行邀我登雲臺高揖衛叔卿恍恍
與之去駕鴻凌紫冥俯視洛陽川茫茫走胡兵流血塗
野草豺狼盡冠纓

有情可觀無迹可履
此古人落筆佳處

秋露白如玉團團下庭綠我行忽見之寒早悲歲促人
生鳥過目胡乃自結束景公一何愚牛山淚相續物苦
不知足得隴又望蜀人心若波濶世路多屈曲三萬六
千日夜夜當秉燭

其憂生耶其感世
耶令人不知所向

大車揚飛塵亭午暗阡陌中貴多黃金連雲開甲宅路
逢鬪鷄者冠蓋何輝赫鼻息干虹蜺行人皆怵惕世無

洗耳翁誰知堯與跖

末二語簡妙以
舉世皆堯故

秦水別隴首幽咽多悲聲胡馬顧朔雪躑躅長嘶鳴感
物動我心緬然含歸情昔視秋蛾飛今見春蠶生嫋嫋
桑柘葉萋萋柳垂榮急節謝流水羈心搖懸旌揮涕且
復去惻愴何時平

世道日交喪澆風散淳源不采芳桂枝反棲惡木根所
以桃李樹吐花竟不言大運有興沒羣動爭飛奔歸來

廣成子去入無窮門

走筆如雲

行鳥飛

碧荷生幽泉朝日艷且鮮秋花冒綠水密葉羅青煙秀
色空絕世馨香竟誰傳坐看飛霜滿凋此紅芳年結根
未得所願託華池邊

秀色

可餐

燕趙有秀色綺樓青雲端眉目艷皎月一笑傾城歡常
恐碧草晚坐泣秋風寒纖手怨玉琴清晨起長歎焉得

偶君子共乘雙飛鸞

容顏若飛電時景如飄風草綠霜已白日西月復東華
髮不耐秋颯然成衰蓬古來賢聖人一一誰成功君子
變猿鶴小人為沙蟲不及廣成子乘雲駕輕鴻

玄風變太古道喪無時還擾擾季葉人雞鳴趨四關但
識金馬門誰知蓬萊山白首死羅綺笑歌無時閒綠酒
哂丹液青娥凋素顏大儒揮金槌琢之詩禮間蒼蒼三
珠樹冥目焉能攀

言不妄作其中實
有塵視一切氣象

鄭客西入關行行未能已白馬華山君相逢平原里壁
遺鎬池君明年祖龍死秦人相謂曰吾屬可去矣一往
桃花源千春隔流水

運斤
成風

蓐收肅金氣西陸弦海月秋蟬號階軒感物憂不歇良
辰竟何許大運有淪忽天寒悲風生夜久衆星沒惻惻
不忍言哀歌建明發

羽檄如流星虎符合專城喧呼救邊急羣鳥皆夜鳴白
日曜紫微三公運權衡天地皆得一澹然四海清借問
此何為荅言楚徵兵渡瀘及五月將赴雲南征怯卒非
戰士炎方難遠行長號別嚴親日月慘光晶泣盡繼以
血心摧兩無聲困獸當猛虎窮魚餌奔鯨千去不一回
投軀豈全生如何舜干戚一使有苗平

醜女來效顰還家驚四鄰壽陵失本步笑殺邯鄲人一
曲斐然子雕蟲喪天真棘刺造沐猴三年費精神功成

無所用楚楚且華身大雅思文王頌聲久崩淪安得郢
中質承風一運斤

孤蘭生幽園衆草共蕪沒雖照陽春暉復悲高秋月飛
霜草漸澀綠艷恐休歇若無清風吹香氣為誰發

登高望四海天地何漫漫霜被羣物秋風飄大荒寒榮
華東流水萬事皆波瀾白日掩徂輝浮雲無定端梧桐
巢燕雀枳棘棲鸛鷺且復歸去來劒歌行路難

綠蘿紛葳蕤繚繞松柏枝草木有所託歲寒尚不移奈

何天桃色坐歎葑菲詩玉顏艷紅彩雲髮非素絲君子
恩已畢賤妾將何為

青春流驚湍朱明驟迴薄不忍看秋蓬飄揚竟何托光
風滅蘭蕙白露灑葵藿美人不我期草木日零落

倚劍登高臺悠悠送春日蒼榛蔽層丘瓊草隱深谷鳳
鳥鳴西海欲集無珍木鸞斯得所居蒿下盈萬族晉風
日已頽窮途方慟哭

倚劍登高臺悠悠送春日
此似阮公語其意不言而至

越客采明珠提攜出南隅清輝照海月美價傾鴻都獻
君君按劍懷寶空長吁魚目復相哂寸心增煩紆

自寵自傷不與世讐見君子立身
足貴班婕妤團扇詩足以參觀矣

翰林讀書言懷呈集賢院內諸學士

晨趨紫禁中夕待金門詔觀書散遺帙探古窮至妙片
言苟會心掩卷忽而笑青蠅易相點白雪難同調本是
疎散人屢貽褊促誚雲天屬清朗林壑憶遊眺或時清
風來間倚欄下嘯嚴光桐廬谿謝客臨海嶠功成謝人

間從此一投釣

贈從兄襄陽少府皓

結髮未識事所交，盡英雄却秦不受賞。
救趙寧為功，託身白刃裏。殺人紅塵中，當朝揖高義。
舉世欽英風，小節豈足言。退耕舂陵東，歸來無產業。
生事如轉蓬，一朝烏裘敝。百鎰黃金空，彈劍徒激昂。
出門悲路窮，吾見青雲士。然諾聞諸公，所以陳片言。
片言貴情通，隸華儻不接。甘與秋草同。

贈范金卿

君子枉清盼不知東走迷離家未幾月絡緯鳴中閨挑
李君不言攀花願成蹊那能吐芳信惠好相招攜我有
結綠珍久藏濁水泥時人棄此物乃與燕石齊撫拭欲
贈之申眉路無梯遼東慙白豕楚客羞山鷄徒有獻芹
心終流泣玉帝祇應自索漠留舌示山妻

玉真公主別館苦雨贈衛尉張卿

愁坐金張館繁陰晝不開空烟迷雨色蕭颯望中來翳

醫昏墊苦沈沈憂恨催清秋何以慰白酒盈吾杯吟咏
思管樂此人已成灰獨酌聊自勉誰貴經綸才彈劍謝
公子無魚良可哀

贈何七判官昌浩

有時忽惆悵匡坐至夜分平明空嘯咤思欲解世紛心
隨長風去吹散萬里雲羞作濟南生九十誦古文不然
拂劍起沙漠收奇勲老死田陌間何因揚清芬夫子今
管樂英才冠三軍終與同出處豈將沮溺羣

贈新平少年

平一
作豐

韓信在淮陰少年相欺凌屈體若無骨壯心有所憑一
遭龍顏君嘯咤從此興千金荅漂母萬古共嗟稱而我
竟胡為寒苦坐相仍長風入短袂兩手如懷冰故友不
相恤新交寧見矜摧殘檻中虎羈紲溝上鷹何時騰風
雲搏擊申所能

秋日鍊藥院鑷白髮贈元六兄林宗

木落識歲秋瓶冰知天寒桂枝日已綠拂雪凌雲端弱

齡接光景矯翼攀鴻鸞投分三十載榮枯同所歡長吁
望青雲鑷白坐相看秋顏入曉鏡壯髮凋危冠窮與鮑
生賈饑從漂母餐時來極天人道在豈吟歎樂毅方適
趙蘇秦初說韓卷舒固在我何事空摧殘

贈崔郎中宗之

時宗之謫官金陵故有此贈

胡鴈拂海翼翱翔鳴素秋驚雲辭沙朔飄薄迷河洲有
如飛蓬人去逐萬里遊登高望浮雲彷彿如舊丘日從
海傍沒水向天邊流長嘯倚孤劍目極心悠悠歲晏歸

去來富貴安所求
仲尼七十說歷聘
莫見收魯連逃千
金珪組豈足酬時
哉苟不會草木為
我儔希君同攜手
長往南山幽

贈裴司馬

翡翠黃金縷繡成
歌舞衣若無雲間
月誰可比光輝秀
色一如此多為衆
女譏君恩移昔愛
失寵秋風歸愁苦
不窺鄰泣上流黃
機天寒素手冷夜
長燭復微十日不
滿匹鬢蓬亂若絲
猶是可憐人容華
世中稀向君發皓

齒顧我莫相違

贈崔司戶文昆季

雙珠出海底俱是連城珍
明月兩特達餘輝傍照人
英聲振名都高價動殊鄰
豈伊箕山故特以風期親
惟昔不自媒擔簦登西入
秦攀龍九天上忝列歲星
臣布衣侍丹墀密勿草絲
綸才微惠渥重讒巧生緇
磷一去已十年今來復盈
旬清霜入曉鬢白露生衣
巾側見淥水亭開門列華
茵千金散義士四坐無凡
賓欲折月中桂持

為寒者薪路傍已竊笑天路將何因垂恩儻丘山報德
有微身

贈溧陽宋少府陟

李斯未相秦且逐東門兔宋玉事襄王能為高唐賦常
聞淥水曲忽此相逢過掃灑青天開豁然披雲霧歲蕤
紫鸞鳥巢在崑山樹驚風西北吹飛落南溟去早懷經
濟策特受龍顏顧白玉棲青蠅君臣忽行路人生感分
義貴欲呈丹素何日清中原相期廊天步

贈從弟宣州長史昭

淮南望江南千里碧山對我行倦過之半落青天外宗
英佐雄郡水陸相控帶長川豁中流千里瀉吳會君心
亦如此包納無小大搖筆起風霜推誠結仁愛訟庭垂
桃李賓館羅軒蓋何意蒼梧雲飄然忽相會才將聖不
偶命與時俱背獨立山海間空老聖明代知音不易得
撫劍增感慨當結九萬期中途莫先退

贈柳圓

竹實滿秋圃鳳來何苦饑還同月下鵲三繞未安枝夫
子即瓊樹傾柯拂羽衣懷君戀明德歸去日相思

贈從弟列

楚人不識鳳重價求山雞獻主昔云是今來方覺迷自
居漆園北久別咸陽西風飄落日去節變流鶯啼桃李
寒未開幽關豈來蹊逢君發花萼若與青雲齊及此桑
葉綠春蠶起中閨日出布穀鳴田家擁鋤犁顧余乏尺
土東作誰相攜傳說降霖雨公輸造雲梯羌戎事未息

君子悲塗泥報國有長策成功羞執珪無由謁明主杖
策還蓬藜他年爾相訪知我在碯谿

安陸白兆山桃花巖寄劉侍御綰

雲卧三十年好閒復愛仙蓬壺雖冥絕鸞鶴心悠然歸
來桃花巖得憩雲牕眠對嶺人共語飲潭猿相連時昇
翠微上邈若羅浮巔兩岑抱東壑一嶂橫西天樹雜日
易隱崖傾月難圓芳草換野色飛蘿搖春煙入遠構石
室選幽開山田獨此林下意杳無區中緣永辭霜臺客

千載方來旋

夕霽杜陵登樓寄韋繇

浮霽滅陽景萬物生秋容登樓送遠目伏檻觀羣峯原
野曠超緬關河紛錯重清輝映竹日翠色明雲松臨海
寄遐想還山迷舊蹤徒然迫晚暮未果諧心胸結桂空
佇立折麻恨莫從思君達永夜長樂聞疎鐘

秋山寄衛尉張卿及王徵君

何以折相贈白花青桂枝月華若夜雪見此令人思雖

然剡谿興不異山陰時明發懷二子空吟招隱詩

秋夜宿龍門香山寺奉寄王方城十七丈奉國
瑩上人從弟幼成令問

朝發汝海東暮棲龍門中水寒夕波急木落秋山空
望極九霄迴賞幽萬壑通目皓沙上月心清松下風
玉斗橫網戶銀河耿花宮興在趣方逸歡餘情未終
鳳駕憶王子虎谿懷遠公桂枝坐銷歇棣華不復同
流恨寄伊水盈盈焉可窮

月夜江行寄崔員外宗之

飄飄江風起蕭颯海樹秋登艫美清夜挂席移輕舟月
隨碧山轉水合青天流杳如星河上但覺雲林幽歸路
方浩浩徂川去悠悠徒悲蕙草歇復聽菱歌愁岸曲迷
後浦沙明瞰前洲懷君不可見望遠增離憂

清異月隨碧山轉水合青天流意境落
晚所謂唐音謝靈運當不如此寫作

北山獨酌寄韋六

巢父將許由未聞買山隱道存跡自高何憚去人近紛

吾下茲嶺地閒喧亦泯門橫羣岫開水鑿衆泉引屏高
而在雲竇深莫能準川光晝昏凝林氣夕悽繁於焉摘
朱果兼得養玄北坐月觀寶書拂霜弄瑤軫傾壺事幽
酌顧影還獨盡念君風塵遊傲爾令自哂

屏高而在雲竇深莫
能準語極灑落自在

流夜郎至西塞驛寄裴隱

揚帆借天風水驛苦不緩平明及西塞已先投沙伴迴
巖引羣峯橫威楚山斷砮

披水切

衝萬壑會震沓百川滿

龍怪潛溟波俟時救災旱我行望雷雨安得沾枯散鳥
去天路長人悲春光短空將澤畔吟寄爾江南管

江上寄元六林宗

霜落江始寒楓葉綠未脫客行悲清秋永路苦不達滄
波眇川汜白石隱天末停棹依林巒驚猿相叫聒夜分
河漢轉起視溟漲潤涼風何蕭蕭流水鳴活活浦沙淨
如洗海月明可掇蘭交空懷思瓊樹詎解渴勗我滄洲
心歲晚庶不奪幽賞頗自得興遠與誰豁

浦沙淨如洗海月明可掇
惜此好景不得小謝來詠

遊敬亭寄崔侍御

我登謝公樓輒繼敬亭作相去數百年風期宛如昨登
高素秋月下望青山郭俯視鴻鷺羣飲啄自鳴躍夫子
雖蹭蹬瑤臺雪中鶴獨立窺浮雲其心在寥廓時來一
顧我笑飯菜與藿世路如秋風相逢盡蕭索腰間玉具
劍意許無遺諾壯士不可輕相期在雲閣

五月東魯行答汶上翁

五月梅始黃蠶凋桑柘空魯人重織作機杼鳴簾櫳顧
余不及仕學劔來山東舉鞭訪前途獲笑汶上翁下里
忽壯士未足論窮通我以一箭書能取聊城功終然不
受賞羞與時人同西歸去直道落日昏陰虹此去爾勿
言甘心如轉蓬

以詩代書荅元丹丘

青鳥海上來今朝發何處口銜雲錦書與我忽飛去鳥
去凌紫煙書留綺牕前開緘時一笑乃是故人傳故人

深相勗憶我勞心曲離居在咸陽三見秦草綠置書雙
袂間引領不暫閒長望杳難見浮雲橫遠山

酬裴侍御對雨感時見贈

雨色秋來寒風嚴清江爽孤高繡衣人瀟灑青霞賞平
生多感激忠義非外獎禍連積怨生事及徂川往楚邦
有壯士鄢郢翻掃蕩申包哭秦庭泣血將安仰鞭屍辱
已及堂上羅宿莽頗似今之人蟲賊陷忠讜渺然一水
隔何由稅歸鞅日夕聽猿愁懷賢盈夢想

送韓準裴政孔巢父還山

獵客張兔置不能挂龍虎所以青雲人高歌在巖戶韓
生信英彥裴子含清真孔侯復秀出俱與雲霞親峻節
凌遠松同衾卧盤石斧冰漱寒泉三子同二履時時或
乘興去去雲無心出山揖牧伯長嘯輕衣簪昨宵夢裏
還云弄竹谿月今晨魯東門悵飲與君別雪崖滑去馬
蘿徑迷歸人相思若煙草歷亂無冬春

送魯郡劉長史遷弘農長史

魯國一杯水難容橫海鱗仲尼且不敬況乃尋常人白
玉換斗粟黃金買尺薪閉門木葉下始覺秋非春聞君
向西遷地即鼎湖鄰寶鏡匣蒼蘚丹經埋素塵軒后上
天時攀龍遺小臣及此留惠愛庶幾風化淳魯縞如白
煙五緜不成束臨行贈貧交一尺重山嶽相國齊晏子
贈行不及言託陰當樹李忘憂當樹萱他日見張祿緜
袍懷舊恩

送趙判官赴黔府中丞叔幕

廊落青雲心結交黃金盡富貴翻相忘令人忽自哂
蹢躅鬢毛斑盛時難再還巨源吐石生何事馬蹄間綠蘿
長不厭却欲還東山君為魯曾子拜揖高堂裏叔繼趙
平原偏承明主恩風霜推獨坐旌節鎮雄藩虎士秉金
鉞蛾眉開玉樽才高幕下去義重林中言水宿五谿月
霜啼三峽猿東風春草綠江上侯歸軒

江夏祖友人

雪點翠雲裘送君黃鶴樓黃鶴振玉羽西飛帝王州鳳

無琅玕食何以贈遠遊徘徊相顧影淚下漢江流

贈別舍人弟臺卿之江南

去國客行遠還山秋夢長
梧桐落金井一葉飛銀牀
覺罷攬朝鏡鬢毛颯已霜
良圖委蔓草古貌成枯桑
欲道心下事時人疑夜光
因為洞庭葉飄落之瀟湘
令弟經濟士謫居我何傷
潛蚪隱尺水著論談興亡
客遇王子喬口傳不死方
入洞過天地登真朝玉皇
吾將撫爾背揮手遂翱翔

秋日魯郡堯祠亭上宴別杜補闕范侍御

我覺秋興逸誰云秋興悲山將落日去水與晴空宜魯
酒白玉壺送行駐金羈歇鞍憩古木解帶挂橫枝歌鼓
川上亭曲度神飈吹雲歸碧海夕鴈沒青天時相失各
萬里茫然空爾思

所謂逸興遄飛此
等處是太白本相

出金門後書懷留別翰林諸公

好古笑流俗素聞賢達風方希佐明主長揖辭成功白

日在青天迴光矚微躬
恭承鳳凰詔歛起雲羅中
清切紫霄迴優游丹禁通
君王賜顏色聲價凌煙虹
乘輿擁翠蓋扈從金城東
寶馬驟絕景錦衣入新豐
倚巖望松雪對酒鳴絲桐
方學揚子雲獻賦甘泉宮
天書美片善清芬播無窮
歸來入咸陽談笑皆王公
一朝去金馬飄落成飛蓬
賓友日疎散玉樽亦已空
才力猶可倚不慚世上雄
閒作東武吟曲盡情未終
書此謝知己吾尋黃綺翁

留別賈舍人至二首

大梁白雲起飄飄來南洲徘徊蒼梧野十見羅浮秋
龍抃山海傾四溟揚洪流意欲托孤鳳從之摩天遊
鳳苦道路難翱翔還崑丘不肯銜我去哀鳴慙不周
遠客謝主人明珠難暗投拂拭倚天劍西登岳陽樓
長嘯萬里風掃清胷中憂誰念劉越石化為繞指柔

秋風吹胡霜凋此簷下芳折芳怨歲晚離別悽以傷
謬攀青瑣賢延我於此堂君為長沙客我獨之夜郎
勸此

一杯酒豈惟道路長
割珠兩分贈寸心貴
不忘何必兒女仁
相看淚成行

太白詩一着情近裏其語便佳勸
此一杯酒數語何謝建安中作

尋魯城北范居士失道落蒼耳中見范置酒摘

蒼耳作

鴈度秋色遠日靜無雲時
客心不自得浩漫將何之
忽憶范野人閒園養幽姿
茫然起逸興但恐行來遲
城壕失往路馬首迷荒陂
不惜翠雲裘遂為蒼耳欺
入門且

一笑把臂君為誰酒客愛秋蔬山盤薦霜梨他筵不下
筯此席忘朝饑酸棗垂北郭寒瓜蔓東籬還傾四五酌
自詠猛虎詞近作十日歡遠為千載期風流自簸蕩詭
浪偏相宜酣來上馬去却笑高陽池

一起二語景

邑何等明淨

春遊羅敷潭

行歌入谷口路盡無人躋攀崖度絕壑弄水尋迴谿雲
從石上起客到花間迷淹留未盡興日落羣峰西

雲從石上起客到
花間迷自是李句

遊謝氏山亭

淪老卧江海再歡天地清
病閒久寂寞歲物徒芬榮
借君西池遊聊以散我情
掃雪松下去捫蘿石道行
謝公池塘上春草颯已生
花枝拂人來山鳥向我鳴
田家有美酒落日與之傾
醉罷弄歸月遙欣雅子迎

落日與之傾一
語稍近陶意

金陵鳳凰臺置酒

置酒延落景金陵鳳凰臺長波寫萬古心與雲俱開借問往
時鳳凰為誰來鳳凰去已久正當今日迴明君越義軒天老
坐三台豪士無所用彈絃醉金壘東風吹山花安可不盡杯
六帝沒幽草深宮冥綠苔置酒勿復道歌鐘但相催

長波寫萬古心與雲
俱開豁懷乃得此語

九日

今日雲景好水綠秋山明攜壺酌流霞
寒菊泛寒榮地遠松石古風揚絃管清
窺觴照歡顏獨笑還自傾落帽

醉山月空歌懷友生

登峨眉山

蜀國多仙山峨眉邈難匹周流試登覽絕怪安可悉青
冥倚天開彩錯疑畫出冷然紫霞賞果得錦囊術雲間
吟瓊簫石上弄寶瑟平生有微尚歡笑自此畢煙容如
在顏塵累忽相失僮逢騎羊子攜手凌白日

荊門浮舟望蜀江

春水月峽來浮舟望安極正是桃花流依然錦江色江

色綠且明茫茫與天平遙迤巴山盡搖曳楚雲行雪照
聚沙鴈花飛出谷鶯芳洲却已轉碧樹森森迎流目浦
煙夕揚帆海月生江陵識遥火應到渚宮城

雪照聚沙鴈花飛出谷鶯
最是佳句下語似更勝

安州般若寺水閣納涼喜遇薛員外又

脩然金園賞遠近含晴光樓臺成海氣草木皆天香忽
逢青雲士共解丹霞裳水退池上熱風生松下涼吞討
破萬象寒窺臨衆芳而我遺有漏與君用無方心垢都

已滅永言題禪房

冬夜醉宿龍門覺起言志

醉來脫寶劍旅憩高堂眠中夜忽驚覺起立明燈前開
軒聊直望曉雪河水壯哀哀歌苦寒鬱鬱獨惆悵傳說
版築臣李斯鷹犬人歟起匡社稷寧復長艱辛而我胡
為者歎息龍門下富貴未可期殷憂向誰寫去去淚滿
襟舉聲梁甫吟青雲當自致何必求知音

尋山僧不遇作

石徑入丹壑松門閉青苔間階有鳥跡禪室無人開窺
牕見白拂挂壁生塵埃使我空歎息欲去仍徘徊香雲
隔山起花雨從天來已有空樂好况聞清猿哀了然絕
世事此地方悠哉

春日獨酌二首

東風扇淑氣水木榮春暉白日照綠草落花散且飛孤
雲還空山衆鳥各已歸彼物皆有託吾生獨無依對此
石上月長歌醉芳菲

我有紫霞想緬懷滄洲間思對一壺酒澹然萬事閒橫
琴倚高松把酒望遠山長空去鳥沒落日孤雲還但恐
光景晚宿昔成秋顏

魯東門觀刈蒲

魯國寒事早初霜刈渚蒲揮鎌若轉月拂水生連珠此
草最可珍何必貴龍鬚織作玉牀席欣承清夜娛羅衣
能再拂不畏素塵蕪

古而
雅

春日醉起言志

處世若大夢胡為勞其生所以終日醉頽然卧前楹覺
來眄庭前一鳥花間鳴借問此何時春風語流鶯感之
欲歎息對酒還自傾浩歌待明月曲盡已忘情

灑然

春滯沅湘有懷山中

沅湘春色還風煖煙草綠古之傷心人於此腸斷續予
非懷沙客但美采菱曲所願歸東山寸心於此足

落日憶山中

雨後煙景綠晴天散餘霞東風隨春歸發我枝上花花
落時欲暮見此令人嗟願遊名山去學道飛丹砂

尋陽紫極宮感秋作

何處聞秋聲脩脩北牕竹迴薄萬古心攬之不盈掬靜
坐觀衆妙浩然媚幽獨白雲南山來就我簷下宿嬾從
唐生決羞訪季主卜四十九年非一往不可復野情轉
蕭散世道有翻覆陶令歸去來田家酒應熟

一起四語

意境清微

江上秋懷

餐霞卧舊壑散髮謝遠遊
山蟬號枯桑始復知天秋
朔鴈別海裔越燕辭江樓
颯颯風卷沙茫茫霧縈洲
黃雲結暮色白水揚寒流
惻愴心自悲潺湲淚難收
蘅蘭方蕭瑟長歎令人愁

秋夕書懷

北風吹海鴈南渡落寒聲
感此瀟湘客淒其流浪情
海

懷結滄洲霞想遊赤城始探蓬壺事旋覺天地輕澹然
吟高秋閒卧瞻太清蘿月隱空幕松霜皓前楹滅見息
羣動獵微窮至精桃花有源水可以保吾生

秋夕旅懷

涼風度秋海吹我鄉思飛連山去無際流水何時歸目
極浮雲色心斷明月輝芳草歇柔艷白露催寒衣夢長
銀漢落覺罷天星稀含悲想舊國泣下誰能揮

王右軍

右軍本清真瀟灑在風塵山陰過羽客愛此好鶯賓掃
素寫道經筆精妙入神書罷籠鶯去何曾別主人

末二語
有意象

經下邳圯橋懷張子房

子房未虎嘯破產不為家滄海得壯士推秦博浪沙報
韓雖不成天地皆振動潛匿遊下邳豈曰非智勇我來
圯橋上懷古欽英風唯見碧流水曾無黃石公歎息此
人去蕭條徐泗空

奇傑 似與古人把臂披
語不徒為獻款憑弔之辭

古意

君為女蘿草妾作兔絲花輕條不自引為逐春風斜百
丈託遠松纏綿成一家誰言會合易各在青山崖女蘿
發馨香兔絲斷人腸枝枝相糾結葉葉競飄揚生子不
知根因誰共芬芳中巢雙翡翠上宿紫鴛鴦若識二草
心海潮亦可量

此亦何
必減漢

擬古

青天何歷歷明星白如石黃姑與織女相去不盈尺銀
河無鵲橋非時將安適閨人理紈素遊子悲行役瓶冰
知冬寒霜露欺遠客客似秋葉飛飄飄不言歸別後羅
帶長愁寬去時衣乘月託宵夢因之寄金徽

高樓入青天下有白玉堂明月看欲墮當牕懸清光遙
夜一美人羅衣沾秋霜含情弄柔瑟彈作陌上桑絃聲
何激烈風卷遶飛梁行人皆躑躅棲鳥起迴翔但寫妾

意苦莫辭此曲傷願逢同心者飛作紫鴛鴦

長繩難繫日自古共悲辛黃金高北斗不惜買陽春石
火無留光還如世中人即事已如夢後來我誰身提壺
莫辭貧取酒會四鄰仙人殊恍惚未若醉中真

清都綠玉樹灼爍瑤臺春攀花弄秀色遠贈天仙人香
風送紫藥直到扶桑津取掇世上艷所貴心之珍相思
傳一笑聊欲示情親

今日風日好明日恐不如春風笑於人何乃愁自居吹

簫舞彩鳳酌醴醕神魚千金買一醉取樂不求餘達士
遺天地東門有二疏愚夫同瓦石有才知卷舒無事坐
悲苦塊然涸轍魚

運速天地閉胡風結飛霜百草死冬月六龍頽西荒太
白出東方彗星揚精光鴛鴦非越鳥何為眷南翔惟昔
鷹將犬今為侯與王得水成蛟龍爭池奪鳳凰北斗不
酌酒南箕空簸揚

世路今太行迴車竟何託萬族皆凋枯遂無少可樂曠

野多白骨幽魂共銷鑠榮貴當及時春華宜照灼人非
崑山玉安得長璫錯身沒期不朽榮名在麟閣

月色不可掃客愁不可道玉露生秋衣流螢飛百草日
月終銷毀天地同枯槁蟋蟀啼青松安見此樹老金丹
寧誤俗昧者難精討爾非千歲翁多恨去世早飲酒入
玉壺藏身以為寶

涉江弄秋水愛此荷花鮮攀荷弄其珠蕩漾不成圓佳
期綵雲重欲贈隔遠天相思無由見悵望涼風前

去去復去去辭君還憶君漢水既殊流楚山亦此分人
生難稱意豈得長為羣越燕喜海日燕鴻思朔雲別久
容華晚琅玕不能飯日落知天昏夢長覺道遠望夫登
高山化石竟不返

太白擬古効漢詩十九首然十九
首多托言李詩實寫結撰大別

感興

裂素持作書將寄萬里懷眷眷待遠信竟歲無人來征
鴻務隨陽又不為我棲委之在深篋蠹魚壞其題何如

投水中流落他人開不惜他人開但恐生是非

寓言三首

周公負斧戾成王何夔夔武王昔不豫剪爪投河湄賢
聖遇讒慝不免人君疑天風拔大木禾黍咸傷萎管蔡
扇蒼蠅公賦鴟鵂詩金縢若不啟忠信誰明之

搖裔雙彩鳳婉孌三青禽往還瑤臺裏鳴舞玉山岑以
歡秦娥意復得王母心區區精衛鳥銜木空哀吟

長安春色歸先入青門道綠楊不自持清風欲傾倒海

燕還秦宮雙飛入簾櫳相思不相見托夢遼城東

風神

佳絕

寄遠

三鳥別王母銜書來見過腸斷若剪絃其如愁思何遙
知玉牕裏纖手弄雲和奏曲有深意青松交女蘿寫水
落井中同泉豈殊波秦心與楚恨皎皎為誰多

陽臺隔楚水春草生黃河相思無日夜浩蕩若流波流
波向海去欲見終無因遙將一點淚遠寄如花人

妾在春陵東君居漢江島一日望花光往來成白道一
為雲雨別此地生秋草秋草秋蛾飛相思愁落暉何由
一相見滅燭解羅衣


長短春草綠緣階如有情卷蕊心獨苦抽却死還生覩
物知妾意希君種後庭閒時當采掇念此莫相輕

托意之妙宛
有風人之致

閨情

流水去絕國浮雲辭故關水或戀前浦雲猶歸舊山恨

君流沙去棄妾漁陽間玉筍日夜流雙雙落朱顏黃鳥
坐相悲綠楊誰更攀織錦心草草挑燈淚斑斑窺鏡不
自識況乃狂夫還



唐詩鏡卷十七